

Segun Ministro Charro Kelly

# Aseguro general lo sanea un parti di Salubridad Publico

ORANJESTAD (AAN) Ministro di Salubridad Publico, Sr. Pedro (Charro) Kelly ta duna su comentario relaciona cu e desaroyo di e concepto di ley pa Aseguros General Medico cu ultimamente a ser entrega na Parlamento.

Pa añanan largo a ser papia di un aseguro pa gastonan medico. Ademas a ser reclama semper cu e Departamento di Salubridad Publico no ta funciona manera debe ser. A ser bisa cu cuidu medico no ta adecuado. Hopi hende ta bay den exterior pa consulta cu mediconan. E gastonan tabata alcanza un punto cu nos comunidad no por paga e cuidu medico cual ariba su mes siguramente tabata falta hopi den cierto ramonan por ehempel cuidu pa patientenan psiquiatrico, cuidu medico pa ancianonan y mucho mas.

Ministro Kelly a trece dilanti cu na referencias di esaki diferente rapport a ser traha pa aconseha e varios gobierno nan con pa ataca e problema existente den nos sis-

tema di Salubridad Publico.

Na luna di Februari 1989 ora cu Ministro Pedro Kelly a tuma encargo di Ministerio di Salubridad Publico, e mandatario a laga evalua tur conseho cu tabata tin ariba e tereno aki. A base di e evaluacion efectua Ministro Kelly a dicidi cu mester reorganisa e parti administrativo y juridico di Cuido Medico na Aruba. E sistema existente ta basa ariba e derechonan di e patientnan, mientras cu e sistema aki no ta duna posibilidad pa registra na un forma optimal e gastonan pa cada tipo di cuidu medico.

Control ariba e gastonan di cuidu medico a bira masha importante; Ministro Kelly a bisa, como cu e gastonan tabata subi sin cu gobierno tabata tin un bista directo ariba e uso di cuidu medico. En corto no tabatin base pa u maneho responsabel, esta pa hiba un bon maneho ariba e tereno di cuidu medico.

Cu introduccion di e aseguro general pa gastonan medico

Ministro Kelly a bisa cu esaki lo sanea un parti di Salubridad Publico y cuidu medico na Aruba. Mes importante ta cu e Seguro General lo percura pa:

- Garantisa tur persona un entrada igual den e sector di cuidu medico, irrespecto su recurso financiero, edad o condicion di salud;

- Mantene un nivel halto di cuidu medico pa tur hende sin gastonan innecesario;

- Jega na un sistema mas organisa y logico den financiamiento di cuidu medico;

- Por controla e gastonan di cuidu medico;

A base di e discussionnan amplio cu esnan encarga cu e proyecto di ley aki tanto na Aruba como na Hulana, a formula na luna di April 1989 e prome rapport "Mogelijkheden en Consequenties van een Algemene Ziektekostenverzekering op Aruba".

Despues cu gobierno a evalua y a tuma desicionnan encunto e rapport aki ariba peticion di

Ministro Kelly a ser traha un draaiboek "Invoering AZV voor Aruba" den luna di Mei 1989. E draaiboek tabata un guia pa ehecutacion di e consehonan. Na luna di juni 1989 e prome concepto "Advies Hoofdlijnen AZV" y "Gezondheidszorgbeleid" a ser entrega. Ministro Kelly a demostra cu e documentonan aki a base di su intruccion a se discuti ampliamente envolviendo tur gremio na luna di July. A solicita e gremionan pa duna nan respectivo comentario por escrito di cual por bisa cu e ultimo reaccion a drenta ariba 23 di Augustus 1989.

Na September 1989 e "Eindadvies" a ser entrega. Entretanto gobierno a pidi un experto juridico den cuadro di ayudo tecnico pa asisti e departamento di legislacion cu formulacion di e ley.

Mester menciona cu den e mesun luna, esta September 1989, e prome concepto di ley a

bin cla y a ser discuti ampliamente cu esnan encarga cu e proyecto y e departamento di legislacion. Finalmente na fin di December 1989 e concepto di ley aki a ser manda pa G.O.A. y S.E.R. y gobierno a ricibi e concepto aki

ariba 30 di Januari 1990.

Ariba dia 5 di Maart 1990 gobierno a manda e concepto di ley pa Raad van Advies cu e peticion pa entrega esaki pa dia 10 di April na gobierno hunto cu nan respectivo conseho.

Segun Ministro Kelly, awe por misa atras ariba un periodo largo di evaluacion, estudio y consehonan duna rond di e ley aki, pero despues di a studia e consehonan y haci e cambionan necesario cu honor mi por bisa cu gobierno a entrega e concepto aki pa Parlamento pa e ser trata y bira un realidad na bienestar di nos sistema di Salubridad Publico.

Durante persecucion

## Polis a los dos tiro di advertencia

ORANJESTAD (AAN) -- Manera ta conoci, tin un gang ta dedica nan mes na joyride autonon di huur especialmente Nissan Sunny.

Di asabramadrua por poco un patruya di Polis a dal frontal control algun auto staciona na Playa. Esaki debi na e hecho cu e V-181, maneha pa un joyrider, a cera e patruya di Polis.

Tabata mas o menos 1.50 or di madrugada ora cu un patruya di Polis a constata e vehiculonan V-181 y V-2409 tabata core den Westraat. Mirando e hecho cu ultimamente un cantidad di auto ta ser joyride, nan a dicidi di persigui nan.

E agente policial a duna señal di para, pero nan no a haci caso.

A cuminsa un persecucion

caminda e Jeep Suzuki V-2409 a coy un direccion y e Nissan Sunny V-181 a coy un otro.

Notable tabata cu den e Jeep tabata tin 5 persona sinta mientras cu den e Sunny solamente uno. E chofer di e Sunny na dos ocasion a cera e patruya di Polis ora esaki a core na banda pa trata di pare. Den un di e casonan, por poco e patruya a bay dal frontal contra autonon staciona.

Nan a pasa den Emmastraat y den Prof. Lorenzstraat, Polis a los dos tiro di advertencia pero e chofer no a haci caso y a sigui core bay.

E V-181 a core bay den Arendstraat. Ora e patruya di Polis a bolbe bay core na banda,

e chofer a drenta Jolastraat y a bolbe cera e patruya. E ora ey,

mirando e peligro, e patruya mester a baha velocidad y e chofer a logra scapa.

Sin embargo, pa mas o menos 2'or Polis a haya informacion cu na altura di Via Nostra den un caminda di santo e auto tabata staciona. E patruya cu a bay na e sitio a constata cu e V-181 en berdad tabata staciona eynan y cu e motor tabata sendi. E chofer mes a baha na awa. A keda constata cu e mesun sistema di joyriding cu ultimamente ta tumando lugar a ser utiliza. Mey hora despues a localiza e Jeep den Boliviastraat pero bashi.

Ta ser sospecha cu ta e mesun gang ta keto bay activo.

Na altura di La Fama tambe a haya e vehiculo V-1461 cu ta procedente di joyriding. Un investigacion profundo ta tumando lugar.

## Concepto di Ley Aseguro General Medico

ORANJESTAD (AAN) Ministro Pedro Kelly a haci entrega di e concepto di ley cu ta regarda "AZV", Aseguro General Medico na Staten pa e ultimo aki ser trata si ta posibel prome cu e periodo di "Recess".

Drs. Wever, presidente interino di Staten a acepta e concepto di ley bisando cu gobierno por ta garantisa cu di parti di parlamento lo haci tur empeno pa trata e ley mas pronto cu ta posibel.

Den caso cu tin pregunta ta urgi gobierno ta contesta esakinan debidamente di manera cu e concepto di ley por ser trata prome cu e periodo di "recess"

den un reunion publico.

Palabranan di gratitud na tanto conseheronan, kendenan practicamente a traha "full-time" den e ultimo lunanan aki ariba e proyecto di ley, como tambe na Sr. Hamilton cu den cuadro di ayudo tecnico a asisti gobierno den preparacion di e proyecto di ley menciona. Palabranan di gratitud a bay tambe pa Dr. J. van Veen, coordinador na e Ministerio di Obras Publicas y Salubridad Publico, profesor F.A. Vorst, Dr. R.M. Lapre, consehero accountant Croes & Croes y tur otro instancia of persona cu di un of otro forma a coopera na realisacion di e ley aki.

## Concepto di ley "Vergunning" entrega na Gobierno

ORANJESTAD (AAN) Recientemente Mr. John Tchong, Director di "Centraal Bureau Juridisch en Algemene Zaken" a haci entrega di e concepto di ley pa otorga permiso na restaurant, hotel, bar y casino na Ministro P. Kelly den sala di reunion di Consejo di Ministranon.

Ta asina cu gobierno a institui un comision cu a tarea pa studia e procedura nobo di e ley pa otorgamento di permiso.

Director di C.B.J.A.Z., kende a fungi como Presidente di e comision a expresa palabranan di elogio na e miembronan di e comision, muy en especial pa Sra. Roimans, jurista, secretaria di e comision kende a traha masha duro mes riba

realisacion di e rapport aki, cual contenido ta ya conoci cerca Ministro Kelly.

Comision ta spera cu Consejo di Ministro trata e rapport mas pronto cu ta posibel pa asina ey por drecha e procedura di otorga permiso pa e tipo di negoshinan ya menciona.

Ministro Kelly den nomber di gobierno a ricibi e rapport y a bisa entre otro cu e ta haña cu e comision a traha rapidamente ariba e rapport y cu gobierno lo tuma un decision pa nos comunidad por conta cu un procedura fijo pa dunamento di "vergunning" permiso pa restaurant, bebida y mucho mas.

Ministro Kelly a gradici e miembronan pa nan bon labor efectua.

## FADA/PRIDE cu Masterplan

ORANJESTAD (AAN) Actualmente directiva di F.A.D.A./P.R.I.D.E. ta trahando duro riba e masterplan pa entrega lo mas pronto posibel na gobierno di Aruba pa por haña un subsidio pa F.A.D.A./P.R.I.D.E., Sr. Ochi Oduber Presidente di F.A.D.A. a trece dilanti durante e conferencia di prensa.

Cu e subsidio aki nos fundacion por bay tuma profesionalnan den servicio pa bay traha riba e tereno di prevencion, ta intencion tambe pa cuminsa cu un drive pa haña donateur sea ta personanan priva of casnan "comercial" Ochi Oduber a trece

dilanti durante e conferencia di prensa.

E masterplan ta encera lo siguiente. 1. Youth to Youth program. 2. Parent to Parent program. 3. Community Awareness program. 4. Drugfree Activities program.

F.A.F.A./P.R.I.D.E. por bisa cu e masterplan aki ta worde traha ala estilo di P.R.I.D.E. cu ta (Parents Resource Institute for Drugs Education) ta un organizacion estableci na Atlanta, Georgia, U.S.A. cu ta trahando pa varios aña riba e tereno di prevencion te mihor manera pa combati e uso di droga y e abuso di alcohol.

Sr. Ochi Oduber a bisa, prevencion ta un parti esencial di nos educacion y educacion ta cuminsa na e momento cu un ser humano nace esta for di den wieg. Esaki kier meen cu F.A.D.A./P.R.I.D.E. mester dirigi su programa di Prevencion na e mayornan y hubentud. Como cu F.A.D.A./P.R.I.D.E. ta comparti cu e filosofia aki di P.R.I.D.E., fundacion aña pasa a dicidi di bira miembro di "The Family of Nation" di P.R.I.D.E. y ta pesey awor nos tin e honor di carga e nomber di "F.A.D.A./P.R.I.D.E. Aruba", Sr. Ochi Oduber a termina bisando.